

TEZĂUR LITURGIC
1 MAI

ACATISTUL
SF. CUVIOS
PAFNUTIE
DE LA
BOROVSK



MOSCOVA, 2000



Акафист

святому преподобному

Пафнутию Боровскому

Кондак 1

Избранный чудотворче, великий угодниче Христов, врачу благодатный, бесов прогонителю, всем любовью притекающим источаяй милости миро, восхваляем тя любовью, отче Пафнутие, ты же, яко имеяй дерзновение ко Господу, от всяких нас бед свободи, да зовем ти:

Радуйся, отче Пафнутие, Боровский чудотворче.

Икос 1

Ангелов Творец, провидя тя ангелом подражателя во плоти имуща быти, от юна возраста облече тя во ангельский чин. Ты же отшед от мира и облекся во иноческое одеяние, крест на рамо взем, вседушно потекл еси во след Распеншегося нас ради Господа: скорбь и труд возлюбив, прилепился еси Христу любовью и

молитвами. Мы же, благодаряще о сем Бога, похвальная восписуем ти:

Радуйся, послушателю Господа зовуща: возьмите иго мое на себе;

радуйся подвижнице, подвигом добрым подвизавыйся;

радуйся, избравый путь тесный, ведущий в живот;

радуйся, смирением высоких достигший.

Радуйся, кротостью в землю кротких вселивыйся;

радуйся, вечное радование на небеси обретший.

Радуйся, заступнице наш, и нас поминаяй пред Богом радующихся о тебе.

Радуйся, отче Пафнутие, Боровский чудотворче.

Кондак 2

Видяще ближнии и дальнии дивное о Бозе житие твое, дарование исцелений и сбытие проречений твоих, вельми удивляхуся и славяще Бога вопияху: Аллилуиа.

Икос 2

Разум твой в Божественная вперив и Божиим светом озарився, дары благодатныя являл еси в себе, яко уголь горящий огнем Божественным в тебе, сущая возгревая к любви Божией, такожде и сущих с тобою просвещая. Молися убо о нас, покровителю наш, да ревнуя житию твоему спасем души наша и тебе благоприятно поем:

Радуйся, разумением воли Божией и тайн Его озаривыйся;

радуйся, сотворивый вся повеленная Христом;

радуйся, в послушаниях монастырских, яко раб неключимый послуживый;

радуйся, образе Евангельского самоотвержения;

радуйся, яко храм Божий сердце твое бысть;

радуйся, яко обитель твою яко рай возделану имел еси;

радуйся, яко велий во Царствии Божиим, яко сотворивый и научивый нареклся еси.

Радуйся, отче Пафнутие, Боровский чудотворче.

Кондак 3

Силою свыше облекий апостолы Господь, облече тя, отче, в ризу спасения, украси тя красотою добродетелей и чудес даром, мы же благодаряще Бога Дивнаго во святых Своих, вопием: Аллилуиа.

Икос 3

Имуще обитель тебе, отче, почивающа zde святыми мощами, радостию исполняется и веселящися умильно тебе вопиет:

Радуйся, избранный сосуде Святаго Духа;

радуйся, по Бозе и Богородице радости наша и покрове;

радуйся, тихое пристанище наше от молвы греховныя;

радуйся, апостольских учений исполнителю;

радуйся, святых отец подражателю;

радуйся, яко ангел, безстрастием просиявый;

радуйся, облаче, от зноя страстей укрываяй.

Радуйся, отче Пафнутие, Боровский чудотворче.

Кондак 4

Буря недоумения смущает мя, како воспою
тя, святе, зане буря страстей и волны грехов
потопляют мя; услыши убо вопль и слезы
потопляемого и бедствующему помози, спасай
мя, прибежище мое, да воспою благодарно Богу:
Аллилуиа.

Икос 4

Слышаще боровские людие, яко тобою
грешнии спасаются, недужнии исцеляются,
бесы прогоняются, гладнии питаются и
скорбящии утешени бывають, потекоша к тебе и
ближнии и дальнии, яко к реце, веселящей град
Божий и люди. Паче же во время глада
устремляхуся вси к тебе с верою в милосердие
твое. Ты же и питал еси приходящия ежедневно
яко тысящи и множае, дондеже глад преста. И
так прославися тобою Отец Небесный; мы же
вспоминающе о сем восхваляем тя усердно
сице:

Радуйся, милосердый отче наш;

радуйся, благодатный врачу душ и телес
наших;

радуйся, отчаянных в милосердии Божиим
утвердителю;

радуйся, смущенных умиротворение;

радуйся, колеблемых утверждение и падших
возстановление;

радуйся, кормчий духовный ко спасению;

радуйся, гладных питателю, нагих же
одеяние и пристанище нищих;

радуйся, страждущим утешение.

Радуйся, отче Пафнутие, Боровский
чудотворче.

Кондак 5

Боготечную звезду уведевше тя, преподобне
Пафнутие, ученицы твои: Иосиф
Волоколамский, Иннокентий, Илия сродник твой
и инии, яко мудрии волсви, ищуще Царя и
Спаса миру и тобою испытующе путь, яко
светильник держаще тя, достигоша того и
радуются ныне с тобою, вопиюще: Аллилуиа.

Икос 5

От многих людей враг творяше пакости тебе
и обители твоей, ты же, ученик сый Христов,
любил еси враги твоя, добро творя ненавидящим

и моляся о них, темже и побеждад еси благими злая. Сего ради Церковь Святая восхваляет тя:

Радуйся, боровская свеще, присногорящая пред Богом;

радуйся, благодатная луче сияющая от солнца Христа Бога;

радуйся, непоколебимый терпения столпе;

радуйся, образе кротости и незлобия;

радуйся, молитвенниче за враги твоя;

радуйся, яко уста еси Божия, изводящая от недостойнаго достойное;

радуйся, миротворче, томужде боголепно и нас научай.

Радуйся, отче Пафнутие, Боровский чудотворче.

Кондак 6

Проповедник веры и упования на Бога дивный явился еси, преподобне Пафнутие егда бо скорбяху братия, яко не имеяху рыб ко дню Светлаго Воскресения Христова, глагола еси о уповании на Бога; в навечерии же Светлаго дне явишася на малом потоце рыбы мнози. Тако

упование на Господа не посрами тя, и прославивше Бога, вси вопияху: Аллилуиа.

Икос 6

Возсиял еси, преподобне, свет ангельския чистоты: во плоти яко безплотен, преподобне, ревнителю цемудрия. Сего ради восхваляем тя:

Радуйся, похвале Творца всяческих и Приснодевы;

радуйся, подражавши Иосифу целомудрием;

радуйся, Моисею Угрину собрате;

радуйся, Крестителю Господню поревновавый;

радуйся, соблазны и искушения далече отринувый;

радуйся, юным покрове и старцем светлосте;

радуйся, недремлющий блюстителю монахов и постников украшение;

радуйся, яко светило небесное земным бывый;

радуйся, сожителю ангелом;

радуйся, боровская похвало и заступниче наш пред Богом.

Радуйся, отче Пафнутие, Боровский чудотворче.

Кондак 7

Хотяй отгнати от святых Церкви всякое богомерзкое злосрадие, явился еси яко благовонное миро житием твоим и словом истины, апостольских же и соборных учений, отче, исполненный сосуд был еси, изгоня из обители глаголющих противная. Тем же святая Церковь ублажает тя и мы спасеннии вопием Богу: Аллилуиа.

Икос 7

Новаго тя Ноя спасенного ковчега обители твоей показа Бог хотящим спастися: наказуя потопом гнева своего преслушающих тя и паки милуя кающихся, мы же благоговейно молим тя: покрый немощи наша, отче, милосердием твоим и смиренною любовью, и сподоби пети:

Радуйся ревностный учениче Христов;

радуйся, притрепетный служителю
Страшных Таин;

радуйся, блюстителю Православия;

радуйся, хранителю чудный обетов
монашеских;

радуйся, милостивый заступниче кающимся;

радуйся, помогаяй и нам соблюдать обеты
наши Богу.

Радуйся, отче Пафнутие, Боровский
чудотворче.

Кондак 8

Странен и дивен был еси на земли, истый же
подражатель небесным житием, словом и
молчанием, яко умилилися видящим тя.
Приидоша бо от князя слуги буйнии, во злобе
хотяще сожещи обитель твою, егда же узреша
тя, аки ангела тиха и светла, внезапно
применишася на кротость и мнози тако
уклонишася от зла и сотвориша благо от
слышания и видения твоего, мы же
прославляюще о сем Бога, умильно вопием ти:
Аллилуиа.

Икос 8

Возведи окрест очи твои, отче, и виждь: се бо
многая чада твоя, с разных стран приидоша к
тебе дарыносяще, паче же с верою и любовию к
заступнику и утешителю своему в скорбех и

нуждах и припадающе молят тя: простри руку помощи требующим, услыши нас из глубины души взывающих:

Радуйся, ходатаю наш у Бога временных и вечных благ;

радуйся, сияние нам Божией милости;

радуйся, дерзновение наше к Богу;

радуйся, яко милостива его обретаем к нам;

радуйся, яко тобою от гнева Божия избавляемся.

Радуйся, отче Пафнутие, Боровский чудотворче.

Кондак 9

Всякое естество человеческое удивися ангельскому житию твоему на земли: попрали бо еси бесов, яко прах под ногама, низложив их шатания, разогнав соблазнов тьму и вся стрелы лукаваго на главу его обратив: сораспялся еси Христу и научил еси многих со страхом пети Богу: Аллилуиа.

Икос 9

Витии многовещаннии не возмогут по долгу восхвалити тя, преподобне, точию ангели

достойно восхваляют ангельскими пении, от нас же, яко из уст младенец приими хвалу сию:

Радуйся, похвало ангелов, монахов же и всея Святыя Церкви;

радуйся, вшедый в радость Господа Бога Твоего;

радуйся, Патриархом в угождении Богу поревновавый;

радуйся, пророков дара сподобленный;

радуйся, апостольская уста;

радуйся, мучеником соучастниче в распятии плоти и в язвах Господних на теле твоём носимых;

радуйся, миру умерый, Христу же Единому поживый;

радуйся, не забываяй и нас заблуждших, призывающих тя;

радуйся, отче, низпосылай нам с небесе милость твою;

радуйся, далече провозгласивый: разумеите языцы, яко с нами Бог.

Радуйся, отче Пафнутие, Боровский чудотворче.

Кондак 10

Спастися хотящии притекаху к тебе, доброму пастырю, указателю путей Господних, сильному о Господе. Ты же яко имеяй дарование прозрения, всех любезно принимал еси, точию, иныя паки отсылая, обаче николиже глаголя о них злая, аще и ведый, мы же благодаряще Бога, дивнаго во святых своих, вопием: Аллилуиа.

Икос 10

Стену тя нерушиму имея и молитвенника тепла, из глубины души тебе, покровителю, глаголем:

Радуйся, промышления Божия о людех исполнителю;

радуйся, сокровище сокровенное обретый и участники себе многи сотворивый;

радуйся, Царствия Божия наследниче и иным молитвами твоими двери отверзаяй;

радуйся, всю жизнь со Христом соображавый и в ничесомже от Него отставый;

радуйся, делателю в винограде Христовом;

радуйся, немощных сило о Господе;

радуйся, искушаемых скорый о Господе покров и заступление;

радуйся, унывающим ободрение и скорбящим радости.

Радуйся, отче Пафнутие, Боровский чудотворче.

Кондак 11

Пение ангельское слышашеся во святем преставлении, отче, святых и богоугодных души твоя, в небесная селения преславно восходящая, горняя бо силы радуящися сретяху тя, поюще Богу: Аллилуиа.

Икос 11

Божием светолитием просвещен быв, отче, яко молния грозная блистал еси, гоня и поражая демоны, якоже и от жены некия отгнал еси их: беси бо являющися, устрашаху ю, чесо ради смущашеся умом и боляше; овогда видяше являющася старца: низка и согбенна, браду имуща седу и велику, худыми ризами одеянна, со властью отгоняюща демоны, и бываше здрава. Слыша и глас: Пафнутий, иже в Боровске, отгонит от тебе бесы. Нетерпит бо спадый денница и тайные клеветы его не

точию присутствия, но и молитв смирения твоего. Мы же, ведуще сия, молим тя: сохраняй и нас от злоб их, да ходим во свете заповедей Божиих, вопиющая ти усердно:

Радуйся, идеже осеняет благодать твоя, отче, отгуду прогонится диаволя сила;

радуйся, освобождаей прибегающих под кров твой от злых духов;

радуйся, неусыпный страже обители твоея;

радуйся, душ и телес наших благий хранителю;

радуйся, вторый наш общий ангеле;

радуйся, в час смертный заступая любящих тя пред Богом;

радуйся, изымая от мытарств души их;

радуйся, недаяй впасти в руке бесом;

радуйся, воздвизая верных к покаянию и с Богом соединяя.

Радуйся, отче Пафнутие, Боровский чудотворче.

Кондак 12

Благодать велию приял еси от Бога, отче, яко меру потрясну и преливающуся, по множеству любви твоя к Богу и ближним, иже и яви тя реку, изливающу струи многи, благодати требующим, источаеши исцеления: мы же, радуящися, вопием Богу: Аллилуиа.

Икос 12

Поюще светлое о Бозе житие твое, хвалим добродетели твоя, яко Святаго Духа дарования, ублажаем святое успение твое, почитаем священную память твою, зовуще любовию:

Радуйся, в мире яко премирен бывый и мир верою победивый;

радуйся, плоть твою Христу покоривый;

радуйся, незлобия и кротости правило;

радуйся, безстрастия светлый доме и смирения глубино;

радуйся, Христово благоухание;

радуйся, заступниче наш на небеси и на земли;

радуйся, душ и телес наших благий хранителю.

Радуйся, отче Пафнутие, Боровский чудотворче.

Кондак 13

О пресвятый и предивный отче Пафнутие, утешителю скорбящих, прими сие наше малое моление, избави ж нас от всяких бед и вечныя изми муки, богоприятным твоим пред Богом ходатайством, да с тобою во веки воспеваем: Аллилуиа.

(Этот кондак читается трижды, затем икос 1 и кондак 1)

Молитва

О священная главо, земный ангеле, небесный человеце, великий чудотворче, преподобне отче наш Пафнутие! К тебе с верою и любовью усердно прибегаем и умиленно просим: яви нам смиренным и грешным святое и многомогущее твое заступление. Не дерзаем, грех ради наших, с свободою чад Божиих, просити Господа и Владыку нашего о помиловании и прощении. Но тебе, молитвенника к нему благоприятна, предлагаем и молим, испроси нам у благости его дары благопотребныя и спасительныя душам нашим: веру праву, благочестие крепкое,

покаяние истинное, прощение грехов, житие совершенное, исправление решительное, да обратившися от злых дел к Богоугождению, прочее не прогневаем Господа нарушением святых его заповедей. Умоли, святче Божий, Всевышняго Творца даровати мир и благочестие стране нашей православной. Сохрани, угодниче Христов, святую обитель твою, созданную тобою, и вся живущия и подвижающияся в ней от всякаго зла ненаветны. Призри милостивно на люди, к тебе прибегающия, и вся прошения их во благое исполни. Всем же нам здравие душевное и телесное, земли плодоносие, тихое и благоугодное житие, благую, христианскую кончину и добрый ответ на Страшном Суде у Всемилостиваго Бога исходатайствуй, яко воистину имеяй велие к нему дерзновение. Ей, отче, вемы, яко много может молитва твоя пред лицем Вседержителя Господа и ничтоже невозможно есть ходатайству твоему, аще токмо восхощеши: сего ради крепко на тя уповаем и на твои святыя молитвы вельми надеемся, яко ты приведеши нас предстательством твоим в тихое пристанище спасения и наследники явиши ны светлаго Царствия Христова. Не посрами же упования нашего, чудотворче

святый. И сподоби нас вкупе с тобою блаженства райскаго наслаждатися, да славим, хвалим и величаем великую милость к нам Человеколюбца Бога, Отца и Сына и Святаго Духа и твое благое, отеческое заступление во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**